

Protocol

**dalla radunonza generala dalla Surselva Romontscha (SR),
venderdis, ils 27 da matg 2016 allas 20.00 uras
ella fermata a Falera**

Tractandas:

1. Avertura e beinvegni
2. Tscharna dils dumbravuschs
3. Protocol
4. Rapport annual 2015
5. Rendaquen 2015
6. Fixar la contribuziun annuala
7. Elecziuns
8. Program da lavur 2016
9. Postulat Silva Semadeni
10. Varia

1. Avertura e beinvegni

Il president dalla SR Vitus Gartmann arva la radunonza fagend in cordial beinvegni a tuts presents. In special beinvegni admetta il president a Johannes Flury (president Lia Rumantscha), Lorenz Alig (president Pro Idioms Surselva) ed agl autur Arnold Spescha. Grond plascher fa era la presenza dils representants dalla vischnaunca da Falera e dallas medias.

Il president ha retschert differentas perstgisas. Ellas vegnan prelegidas e pridas per enconuschientscha.

Pia Däscher-Casutt beneventa medemamein ils presents ed admetta era el num dalla suprastonza da Falera in cordial beinvegni. Ella presenta la vischnaunca da Falera cun sia infrastruttura, fatgs economics, la geografia ed entgins loghens culturals. Plinavon explichescha ella la muntada dil lungatg romontsch en vischnaunca.

La gliesta da tractandas ei vegnida publicada el Fegl official dalla Surselva. Ils commembers/ras han retschert las tractandas per posta. La gliesta da tractandas vegn approbada unanimamein.

2. Tscharna dils dumbravuschs

Evelina Giger ed Esther Hendry vegnan elegidas sco dumbravuschs.

3. Protocol

Il protocol dalla radunonza generala 2015 ei publicaus silla pagina d'internet dalla SR, www.surselva-romontscha.ch, ultra da quei vegn el projectaus vid la preit. Il protocol vegn approbaus unanimamein.

4. Rapport annual 2015

La midada da termin sin il venderdis sera enstagl dalla sonda suentermiezdi ei stau ina prudenta adattaziun al temps e la suprastanza dalla SR ha saviu beneventar in bi diember da commembers e hosps alla radunonza generala.

La nominaziun perschuadenta da signur Donat Nay da Zignau sco niev representant dalla SR en suprastanza dalla Ligia Romontscha ei stau in punct central da quella sera. Sper diversas autras mutaziuns ei l'elecziun da Rita Bearth da Fuorns sco nova consuprastanta dalla SR da menziunar.

Il president Vitus Gartmann menziuna che la suprastanza dalla SR ei s'entupada nov gadas a sesidas usitadas e differents consuprastants han frequentau ulteriuras sesidas extraordinarias; seigi quei en connex cun la LR ni era cun projects actuals.

Plan d'instrucziun 21: L'inoltraziun dalla posiziun finala e comunabla dil PI 21 entras la LR alla Regenza Grischuna ha caschunau per part critica massiva da singulas persunas e dallas medias enviers igl agir dalla LR. Quei malgrad che la posiziun inoltrada dil PI 21 ei vegnida purtada - ni silmeins acceptada - dallas 3 uniuns affiliadas dalla LR sco era dallas differentas conferenzas scolasticas romontschas. La suprastanza dalla SR ha sinaquei communicau ella pressa in scriber e manifestau sia opiniun sustenend la lavur ed igl agir democratic en caussa dalla LR. Era sche nossa comunicaziun mediala ei la finfinala vegnida publicada mo sco brev da lectur ei il resun staus considerabels ed ha confirmau nossa posiziun.

Presidi Lia Rumantscha: Duront la stad ed igl atun vargau ha la midada da presidi dalla LR caschunau bia lavur ed engaschi. La tscherca e preselecziun d'in successur da Duri Bezzola ei tuttavia buca stada semplia. Las circumstanzias aunc adina actualas, l'integraziun e l'acceptanza dalla persuna per quei post brisant, sco era igl interess e la promptadad da surprender quella incarica, han restrenschiu considerablamein la schelta da candidatas e candidats. Il proceder electoral per ina sligiaziun cuntenteivla ed acceptabla per la maioritad dalla Romontschia ei segir staus in bien ton pli difficults e stentus che quei ch'ils sempels commentaris e las propostas ellas medias han fatg paleis. La suprastanza dalla SR ha collaborau intensivamein cun la suprastanza dalla LR duront quella procedura electorala. Demai ch'ina candidata resp. in candidat elegibel ord la Surselva era semplamein pil mument buc avon maun ha la suprastanza dalla SR - sebasond sin ina seduta cun ils delegai dalla SR - susteniu e promoviu l'elecziun da signur Johannes Flury alla radunonza da delegai dalla LR igl october a Mustér. Dad ina radunonza extraordinaria enteifer la SR ha la suprastanza desistiu cunscientamein, demai che signur Johannes Flury era il sulet candidat official.

Ediziuns: Per incumbensa dalla radunonza generala ha la suprastanza ediu in cudisch da lectura pil scalem miez. Il december ei il cudisch da leger per affons "*Il Vamperlin*" vegnius edius. Medemamein ein ils dus cudischs exausts "*Romontsch - ina schanza unica*" ed "*Aunghel, lieur, capetscha da miserocla... e 24 historias d'advent*" vegni restampai.

Sco communicau avon in onn ei l'ediziun d'in ulterior tom ella retscha dil Tschespet stau nossa finamira. La vernissascha ei planisada pigl atun vegnent. Nus selegrein zun fetg d'astgar edir Nies Tschespet 76 cun il tetel "Ragischs". El cuntegn l'ovra cumpletta da poesias dil veterinari dr. Alexander Maissen e vegn illustraus dad Armin Albin da Rueras.

Ultra dil niev Tschespet ha la SR surpriu spontanamein l'ediziun nunprevida dil secund tom da poesias da signur dr. Arnold Spescha. Ei setracta d'ina succesziun da siu cudisch "Ei dat ils muments da pass lev - Zeiten leichtfüssigen Schritts" edius 2007 dil Limmat Verlag e dalla SR. Il niev cudisch senumna "Ei catscha dis – Der Tag bricht

an" e la SR renda cun quella ediziun respect, honor ed engraziament agl autur per ses numerus merets e siu grond engaschi per nies romontsch. Igl autur Arnold Spescha astga festivar il proxim meins siu 75 avel anniversari e nus undrein quella festividad cun la vernissascha da siu niev cudisch ils 24 da zercladur 2016 ella aula dalla casa da scola a Glion.

Sper las atgnas ediziuns ha la SR susteniu la realisaziun da differents auters projects, sco per exempel il cudisch da poesias dad Alfons Tuor e la cronica da Castrisch.

Sper igl engaschi litterar ha la SR aunc creau blocs sco augment tier nos cullis, e restampau las cartas da troccas e da jass. Ils buttons "jeu sai romontsch" havein nus distribuì en differentas fatschentas. Il diever da purtar els ei denton deplorablamein mudests.

Archiv dalla SR egl inplus: Damai che la survesta digl inventari, dils protocols e da documents dalla SR era entochen ussa munglus essan nus vidlunder d'archivar il suranumnau tier inplus a Laax.

Pil grond engaschi admetta il president in cordial engraziament als consuprastonts sco era a Donat Nay e Conradin Klaiss che assistan allas sesidas.

5. Rendaquen 2015

Il cassier Carl Cafilisch presenta il quen ed explichescha detagliadamein las singulas posiziuns. Il quen siara cun entradas da CHF 45'054.70 ed expensas da CHF 51'700.61, pia cun ina sperdita da CHF 6'645.91. Igl agen capital munta a CHF 121'803.52, da quei mieds liquids da CHF 72'653.06

Cunquei ch'ils revisurs ein buca presents vegn il rapport dils revisurs prelegius entras il cassier. El rapport proponan ils revisurs d'approbar il quen sco presentaus. Il president tschenta en votaziun il quen, il qual vegn approbaus unanimamein. Silsunter engrazia il cassier partent a Monica Carigiet-Schmid ed a Carin Coray dalla fatschenta «inplus» per la buna collaboraziun.

6. Fixar la contribuziun annuala

La suprastonza propona da schar las contribuziuns sco tochen da cheu:

- commembers singuls CHF 30.-
- secziuns/pleivs/uniuns CHF 50.-
- persunas giuridicas CHF 100.-

Quella proposta vegn acceptada unanimamein.

Las contribuziuns per vischnauncas ein vegnidadas fixadas egl onn 2014 per in in cuoz da 5 onns e stattan buc en votaziun.

7. Elecziuns

Eleger presidi

Il president Vitus Gartmann semetta a disposiziun per l'elecziun d'ina ulteriura perioda d'uffeci. El vegn reelegius unanimamein e cun grond applaus.

Eleger la suprastonza

Suenter in liung temps da grond engaschi en suprastonza ha Carl Caffisch demissiunau sco suprastont. El num dalla SR engrazia Alberto Palaia grondamein per siu engaschi en favur dil romontsch.

La suprastonza propona da buca remplazzar il suprastont. Da niev secumponess la suprastonza allura da 7 commembers. Tenor statuts ei ina representanza da silmeins 5 persunas necessaria.

Suandontas persunas stattan a disposiziun per ina reelecziun: Angelica Arpagaus, Rita Bearth, Ser Jan-Andrea Bernhard, Flurina Cantieni, Andrea Kobler ed Alberto Palaia. Els vegnan reelegi unanimamein per ina ulteriura perioda d'uffeci da treis onns.

Eleger revisorat

La suprastonza propona da reeleger la revisura Nicole Casaulta-Battaglia ed il revisur Marcus Holderegger. Els vegnan reelegi unanimamein.

Eleger delegadas e delegai dalla LR

La Surselva Romontscha ha il dretg da 15 delegadas e delegai tier la Lia Rumantscha. Entras lur funcziun en suprastonza ein 7 delegai gia elegi. Martin Gabriel ha demissiunau sco delegau cun quei ch'el ei gia delegau dalla ANR. La suprastonza propona il giuven Marc Elia Solèr da Lumbrein sco niev delegau. El vegn elegius unanimamein.

Sco uleriurs/as 7 delegai/das propona la suprastonza: Martin Cabalzar, Francestg Friberg, Anne Glantz, Curdin Maissen, Toni Schmid, Paul Valentin Solèr (tuts veder) e Tresa Deplazes (tochen da cheu suppleanta). Els vegnan reelegi unanimamein.

Remplazzament suppleant/a

La suprastonza propona dunna Ricarda Caderas-Vinzens da Luven sco nova suppleanta. Ella vegn elegida unanimamein. Ils ulteriurs suppleants vegnan confirmai en lur uffeci.

8. Program da lavur 2016

Igl agir sin palancau politic vegn segir era ad esser vinavon ina impurtonta incumbensa dalla Surselva Romontscha. Sonda, ils 11 da zercladur 2016, vegnin nus a prender part dalla dieta publica dalla Lia Rumantscha. Ina damonda centrala dalla dieta vegn ad esser co la LR savess democratisar sias structuradas. Tgi che ha interess da prender part sa aunc s'annunziar entochen mardis ils 31 da matg.

Sper la lavur politica ha la Surselva Romontscha era l'incumbensa da promover la litteratura e la cultura romontscha. En quei senn essan vid elaborar ils suandonts projects:

Vamperlin: Il cudisch ei edius. En in proxim pass suondan fegls didactics - en fuorma online - per las scolas. Quella lavur vegn fatga en collaboraziun cun la Conferenza generala Surselva.

Nies Tschespet 76: Nus selegrein zun fetg d'astgar edir Nies Tschespet 76 cun il tetel "Ragischs". El cuntegn l'ovra cumpletta da poesias dil veterinari dr. Alexander Maissen e vegn illustraus dad Armin Albin da Rueras

Ei catscha dis – Der Tag bricht an: La SR ha surpriu spontanamein l'ediziun nunprevida dil secund tom da poesias da signur dr. Arnold Spescha. La SR renda cun quella ediziun respect, honur ed engraziament agl'autur per ses numerus merets e siu grond engaschi per nies romontsch. Igl'autur Arnold Spescha astga festivar il proxim meins siu 75 avel anniversari e nus undrein quella festividat cun la vernissascha da siu niev cudisch ils 24 da zercladur 2016 ella aula dalla casa da scola a Glion.

Archiv dalla SR egl'inplus: Damai che la survesta digl'inventari, dils protocols e da documents dalla SR era entochen ussa munglus essan nus vidlunder d'archivar il suranumnau tier inplus a Laax.

Cartas da jass, troccas e blocs: Gest arrivai ein las cartas da jass e da troccas che la suprastanza ha decidu da restampar. Era ha la SR schau producir dacuort blocs cun logo.

Davart dils commembers dat ei neginas propostas ed il program da lavur 2016 vegn approbaus unanimamein.

9. Postulat Silva Semadeni

Alla suprastanza dalla SR ei vegniu surdau l'incumbensa da tractar il postulat « Allegra, Romanisch und Italienisch sollen leben ! » da Silva Semadeni. Nies commember Lorenz Alig presenta il postulat resumond il cuntegn e citond entginas passaschas. Il text cumplet vegn projectaus vid la preit.

Signur Alig fa attents sin entginas pretensius (per part era zuppadas) dil postulat. Aschia ha dunna Semadeni confirmau a scret ch'il rinforzament dil romontsch stoppi succeder era cun rinforzar il RG. Ad ulteriuras damondas tier igl'agen postulat ha dunna Semadeni buca vuliu prender posiziun. Lorenz Alig tschenta la damonda da metter en votaziun ina resoluziun.

Cuntegn: Cun questa resoluziun sustegn la radunonza generala dalla Surselva Romontscha la finamira dil postulat „Allegra...“ da Silva Semadeni dad intimar la Confederaziun da rinforzar il romontsch ed il talian el Grischun. La radunonza generala refusa denton tuttas stentas da vuler rinforzar il rumantsch grischun che ha gia oz ina posiziun ferma avunda per ademplir sia funcziun dada ad el. Il text cumplet dalla resoluziun sesanfla ell'annexa da quest protocol.

La radunonza generala dalla SR accepta la resoluziun cun 57 vuschs, 4 resalvas e neginas cuntervuschs. La radunonza dat cheutras alla suprastanza l'incarica d'inoltrar la resoluziun ensemen cun las autras uniuns che prendan la medema decisiun.

Il president Vitus engrazia per la lavur prestada e pigl «egl'aviert» da nos commembers.

10. Varia

Johannes Flury, president dalla LR, engrazia per l'invitaziun ed exprima siu plascher da veser ina radunonza beinvisitada. Pertuccont la resoluziun eis el levgiaus che la radunonza generala sustegn la part dil postulat da pretender in rapport. Aschia dat ei p.ex neginas cefras pertuccont il diever dil lungatg romontsch. Era arisguard la viseta da questa stad da dunna Isabelle Chassot (menadra digl'Uffeci federal da cultura) tier la LR eis ei impurtont dad haver il sustegn dalla basa. Plinavon admetta signur Flury in invit a tuts interessai alla dieta gia menziunada dalla suprastanza.

Lorenz Alig: A caschun dalla radunonza da delegai dils 31-10-2015 a Mustér han ils dus referents Glaser/Bisaz fatg attents ch'ei detti in problem pertuccont il fatg che persunas dallas medias ein el medem moment era delegai dalla LR. Quei cunterfa alla separaziun da pussonza. Glaser/Bisaz dian che quei astgi buc esser. Differentas uniuns romontschas ein en quella situaziun ch'ellas han commembers ch'ei delegai dalla LR ed el medem mument era representants dallas medias, seigi quei tier RTR, ANR, LQ ni autras medias.

Alig damonda la suprastonza dalla SR sch'ella seigi gia sefatschentada cun quella tematica e sch'ella hagi gia fatg patratgs co slijar quei problem?

Vitus Gartmann conferma dad haver enconuschientscha dils rapports numnai. Tochen il gi dad oz ha la suprastonza aunc buca tractau quei problem. Ins hagi vului spitgar igl agir dalla LR, las propostas che vegnan fatgas alla dieta che suonda proximamein sco era propostas da commembers.

Lorenz Alig supplichescha la suprastonza dalla SR da sefatschentar cul problem e da far ina proposta per mauns dalla radunonza generala dalla SR dil 2017 - el senn dad ina purificaziun dalla situaziun - aschia ch'ei sa vegnir votau en caussa a caschun dalla proxima radunonza generala.

Meinrad Cadruvi fa la proposta da realisar ina «rundella romontscha» tier il niev sviament a Glion. Quella proposta ha el era gia plazzau tier a LR.

Conradin Klaiiss (menader formaziun LR) aschunta che la LR ha gia plazzau quei giavisch tier la vischnaunca da Glion.

Arnold Spescha (autur dil cudisch "Ei catscha dis") ha grond plascher che la SR edescha cudischs ed engrazia grondamein per la ediziun da sias poesias. Engraziar less el era per la buna collaboraziun dil president Vitus. Alla SR ed alla Romontschia giavischa el bia plascher vid il lungatg e ch'ei "catschi adina puspei dis".

David Flepp (collaboratur LR) fa attents sil project dalla dumbraziun dils Romonschs ed envida tuts da s'enscriver tier la LR. Actualmein ein 4'649 persunas s'enscrettas.

En num dalla suprastonza engrazia Vitus Gartmann al cassier partent Carl Cafilisch per la lavur prestada, per la buna ed emperneivla collaboraziun e surdat ad el in pign present.

Allas 21:40 uras siara il president la radunonza generala engraziand per il sustegn ed engaschi da tut ils presents, als nievelegi per lur promptadad da surprender in uffeci ed alla vischnaunca da Falera per la hospitaliad.

Suenter la radunonza envida la vischnaunca da Falera ad in aperitiv.

Laax, ils 20 da zercladur 2016

l'actura
Flurina Cantieni

Text dalla resoluziun

1. Cun questa resoluziun sustegn la radunonza generala dalla Surselva Romontscha da principi la finamira da cussegliera naziunala Silva Semadeni dad intimar la Confederaziun da rinforzar il romontsch ed il talian el Grischun.
2. La radunonza generala refusescha denton tuttas stentas da vuler rinforzar il rumantsch grischun che ha gia oz ina posiziun ferma avunda per ademplir sia funcziun daus ad el. Ils motivs principals per quella renviada ein:
 - In engaschi per in rinforzament dil rg vegn buca sustenius dil pievel romontsch.
 - La fortificaziun dil rg fagess donn als idioms ch'ei las ragischs e las alas dil romontsch.
 - Ell'entira historia dil romontsch ha nuot dividiu la Romontschia talmein e schendrau tonta discordia denter ils Romontschs sco quei ch'il rg ha fatg. Stentas per in support dil rg sco patertgadas da cussegliera naziunala Silva Semadeni periclitassen danovamein la pasch linguistica cuntunschida ed acquistada aschamein el decuors dils davos onns. La via co tgirar ils idioms ed el medem mument era il rg passiv ei vegnida anflada ils davos tschun onns:
 - Las vischnauncas han votau e decidu davart il lungatg uffical communal.
 - Il Plan d'instrucziun 21 che definescha il diever e l'applicaziun dils idioms e dil rg ei definius e vegn acceptaus dallas treis grondas uniuns linguistic-culturalas dallas treis valladas (UDG, URG, SR) sco era dallas treis conferenzas scolasticas (CGL, CGGC, CGS) e dad autras uniuns ed instituziuns sco p.ex. la Pro Idioms Engiadina e la Pro Idioms Surselva cun lur bunamein 5'000 commembers.
3. La radunonza generala dalla SR intimescha la Ligia Romontscha da sustener tuttas stentas per mantener la pasch linguistica, s'engaschond el senn da questa resoluziun.